

Aksi sulung pada KL2017 beri 1,001 makna

profil



Muhamad Suhairi Sulaiman

→ Tarikh lahir: 20 Disember 1993
 → Tempat lahir: Kuala Pilah, Negeri Sembilan
 → Kedudukan dalam keluarga: Anak bongsu daripada enam adik-beradik
 → Antara Pencapaian:
 • Pingat perak (acara regu) KL2017
 • Johan SUKIPT 2014 dan 2016
 • Pingat gangsa ASEAN University Games 2013

Oleh Nor Azma Laila
 norazma@bh.com.my

► Kuala Lumpur

Muhamad Suhairi Sulaiman tidak pernah menyangka pembabitan dalam sukan sepak takraw sejak di bangku sekolah akan membawa kepada kejayaannya membarisi skuad kebangsaan yang bersaing pada Sukan SEA Kuala Lumpur 2017 (KL2017).

Pelajar Ijazah Sarjana Muda Pendidikan (Pendidikan Jasmani), Universiti Putra Malaysia (UPM) itu beraksi sebagai pemain apit kiri dalam kedua-dua acara regu dan quadron.

Baginya, penyertaan julung kali dalam saingan temasya itu memberi 1,001 makna peribadi selepas terpaksa melepaskan peluang sama pada tahun 2013.

Bukan laluan mudah


“Perjalanan menempatkan diri dalam pasukan kebangsaan untuk KL2017 bukan laluan mudah kerana terpaksa bersaing dengan atlet sudah berpengalaman, malah menanggalkan pengajian yang sepatutnya tamat pada April lalu.

“Antara cabaran utama diharungi ialah berdepan musuh tradisi, Thailand, dan mengorbankan masa pengajian kerana perlu menghadiri sesi latihan serta pelbagai pertandingan di dalam dan luar negara,” katanya ketika ditemui di sini.

Fokus pengajian

Mengimbau awal penyertaan dalam arena sepak takraw, beliau mula aktif ketika berada di Sekolah Sukan Tunku Mahkota Ismail (SSTMI), Bandar Penawar, Johor, sebelum terus bergiat di kampus.

“Percubaan pertama menyertai Sukan SEA ialah



pada tahun 2013 tetapi tidak dapat memberi komitmen sepenuhnya kerana lebih memfokus pada pengajian.

“Oleh itu, saya memilih untuk aktif menyertai pertandingan peringkat universiti sahaja, antara lain berjaya membantu UPM meraih pingat gangsa pada ASEAN University Games 2013 melalui acara berpasukan dan regu,” katanya.

Anak kelahiran Negeri Sembilan itu juga pernah berentap pada Karnival

Sukan Majlis Sukan Universiti Malaysia (MASUM) serta meraih kejuaraan pada kejohanan Sukan Institusi Pengajian Tinggi (SUKIPT) 2014 dan 2016.

Terbaru, anak bongsu daripada enam adik beradik itu sedang mempersiapkan diri menyertai pertandingan King’s Cup World Championship di Thailand pada bulan depan, selain menjalani latihan untuk saingan Sukan Asia 2018 di Jakarta.

[FOTO SAIFULLIZAN TAMADI / BH]